

Yina giba
Tû
du togusuda



TUDAGA



TOUBOU

Tû

Tibesti

Yina giba Tû du togusuda

L'ancienne histoire du Tibesti

تاريخ تيبستي القديم

Cette édition : janvier 2012



Langue : Tudaga (Toubou) – parlé :

- au Tibesti au Tchad
- au Kawar au Niger
- au Fezzan et Koufra en Libye

تطق اللغة التبو :

- بتيبستي في تشاد
- بكوار في نيجر
- بفران و كفره في ليبيا

Traduction du titre :


*Les clans et les marques
et les noms des Toubou*

ترجمة العنوان :

العشائر و السمات و
الأسماء التبو

Genre : histoire

Texte tiré d'une cassette :



Dessin de couverture : tiré de page 90 (*Chameau du sud*) de
Sahara et Soudan par D^r Gustave Nachtigal, 1881
(traduit par Jules Gourdault, Paris : Librairie Hachette
et C^{ie})

Cette édition jan 2012 : 1000 exemplaires

© 2006 Association SIL
© 2011 Comité pour le
Développement de la
Langue Tedaga

© جمعية SIL ٢٠٠٦
© لجنة لتطوير لغة التبو ٢٠١١

Gunna du gubudi-ĩ



Tuda giba hosa
dunoda numo činakã
yê anna ŋgo adaga
šera Tuda hoktundu
yibeyidã yê durda giba
dunoda hosã yê :

Anna-ã mura murta
tuzoo yê sã ču yê kora
kua čĩidi, anna guru
hosa kua-ã gunna čera
hundã kõi a hi čũo.

Gubudi durda-ã : **ŠAHAĨ BUGAR** mi. Aũ anna čabčunu ni
adaga šeraa-ã činaũwã muro. Ôwonni, durda-ã du durdo yunu
gunna du bui yogusã muro. Sũgoi **WÊDEI KÎHIDE** mi durdo
togus. Ôwonni, gudi hunã čirri a Yibi lau **OBDIGADIR TURKI**
mi durdo togus. Kõmma TÛ čĩidi, Burku hu layini.

Anna hoktundu adaga šeraa-ã činakã yê anna dunoda ŋgo TÛ
hu hosã yê :

1- **HASAN YISSA** mi

2- **ARAMI TÔTI** mi

3- **WAŠA**

4- **MÛSA TOKOMO** mi

5- **SOLOI KILIMI** mi

6- **DAZI ARAMAĨ** mi

7- **BOZO ÔIYAĨ** mi

8- **TOLLĨ ÔBU KÔZI** mi

9- **SALA WORKEDI** mi

10- **SUGUĨ TAŊGIŠI** mi

11- **HAĨ TAŊGIŠI** mi

12- **MAHMÛT TÔGOREI**

LAĨLAĨDE mi

13- **TÎDEI MANNAMANNA** mi

14- **ALIHA GETĨ** mi

15- **AZAĨ TUDO** mi

16- **HILER DAZI** mi


17- **ORJO HASAN** mi

18- **SÔNNĨ ŠELEMAĨ** mi

19- **ORDĨ ATUMAN** mi

Odu, anna guru aũ aŋgaldo turo ho labara hundã turo turo du
hiyindi.

HASAN YISA MI



Yoo, odu ngiṣa hunã hininiri. **HASAN YISA** mi ngiṣa hunã ndê ?



HASAN YISA mi ômuri budi gali, ômuri ṅaliga hunã ndû nũwo muro, yunu dahu hunã du de yunu ômuri yidado yidannó yugó. Yari. Anna kôî di kiñari ni guyuni, aṅgaldô aṅgal ni yida, kunjodo kunja ni yida. Aũ numoo ni aũ dunodo.

HASAN durda-ã mannu, gûbule ṅgo muro hi layindi. Durda diri yidadã mannu, muro hi borsu sôorčindi. **HASAN** ômuri budi dunodo.

ARAMI TÔTI MI



ARAMI TÔTI mi ndo ?



ARAMI TÔTI mi kalli nogaã čulodi. Lôko to dîna-ã ha anna guyundu bodura ni yogusudi, ôreze annaa ni guyundi. Tada gunna čuduroo, zabčini. **ARAMI TÔTI** mi aũ saraã do nogaã čulodi. Ômuri gali.



ARAMI TÔTI

(tiré de page 208 de
Sahara et Soudan par
D^r Gustave Nachtigal,
1881)



Ŋgo lôko turo adibi turo ho čulodã, to ŋga koo di čulodu ?



Anna dîne ŋgoa-ã tiri dûli hi yugondunnó yĩngaldu, adibi Dazi dôu môguri turo aya Tû yûgurtudã zabčunu, dî numo hunã keyunu ni nûmoguri če. Kôî anna hunaã keyi.



Aũ turo čoŋu yida tigrin ?



Ūu, aũ turo **ČEKE** čindi čoŋu yida. Odo mannu su yida. Tigiri ni domma ha nûmoguri če. Lôko čenã, « Daũwo ni ômuri numa četu sobusu ! či. Daũwo ni numo numa keniniri » či. Amma môgiri yĩngaldu kôî nurã tidedi činã, kôî hunã keyi.



Ŋga koo di adimmi yê ômuri-ĩ yê ne yihidu ?



ARAMI TÔTI mi ômuri kalli yĩngaldu, anna čabči tigiri, adimmi ômuri hunã lau barayi čoŋ.



Ŋga koo di barayi čonju ?



Tigirĩ muro, ômuri-ĩ lau « Adibi numa kunjo di baraniri, nogoũ lodurĩe yingaldu, či. Nogoũ loduri ni zamiri ni adimmi njaasoo ni nuro četu soburi, či. Njaasú numo hunã tedĩe ni numo hunã keniri » či. Odu amma mannu ardiyi če. Čenã, adimmi : « Numo nurã kedu ! » či. Taa, numo hunã keyi.



To di gubudi adimmi dubana **ARAMI** hi čeniin ?



Ůu, ŋgo gubudi dubana čeni. **ARAMI** yari gonne he dubana čeni.



Zaga dubana čenĩ lerčunnon ?



Ůu, lerčunno. Nogaã čuloda yê huza huzayina yê tada gunna domma bazu dubana če. Dubana tada bazuã, domma ha tigiri čulod.



Yina gala guda yogusudo čîn ?



Yina-ã giba gali di hananurdãá noó, budi
kalli. Yina gala mundu yogus.

MAHMÛT TÔGOREI LAINLAİNDE MI



MAHMÛT TÔGOREI LAĪLAĪDE mi aũ to muro, aũ ndũ koo ?



LAĪLAĪDE mi na čindiã anna gala. Muro Têdemii. **MAHMÛT LAĪLAĪDE** mi kalli. Gunnadooni, gorsu yê huza yê četu yida. Dgo Yogodi-ĩ mannu četu gorsa budi ni yogus. Ôwonni, abba hunã četu Zuar tigirdu ni Zuari-ã četu gorsu bui ni yogus. Aũ gũrbi ni kalli. Nũ wôku a tĩyukã du mia hundã mannu kalla.



Abba hunã **TÔGOREI** Zuar čillaa tigin ?



Ůu, **TUMAN TÔGOREI** Zuar čillaa tigiri.



Nũgoi Zuar čillaa tigrĩ ?



Dûe hunã Zuari-ã guyundã, Zuar tigiri.



Dûe-ã guyundĩ yari yugonnú yee nga koo ?



Lôko to yari yugó. Yari yugonnó di Zuar tigiri. Durdo **SAHAĬ** mannu lôko to diri čubonú, **TÔGOI** durdo. Kôî to di gorsu yogusudu anna ôguzuu ôguzuu mannu, čado. Dûe hunã mannu, hakunnó di zabtu.



Dûe-ã hakunnũú ?



Hakunú. Anna ôguzuu ôguzuu gorsu-ã du čado.



Mi hunu turo kubaa čongã muro **MAHMÛT** ni ?



Ůu, **MAHMÛT LAĬLAĬDE** mi.



Ňga koo di kubaa čonĝu ?



Lôko gorsu-ã du ômure-ã hoktundã muro hi kubaa čonĝo. Anna-ã gorsu-ã yogusudu zabtundã, **TUMAN TÔGOREI**, mi hunu turo **KONO** čindi, muro hi ôdi kusu če. Taa, **TUMAN TÔGOREI** yuhadiadu : « Mi taŇu **MAHMÛT LAÏLAÏDE** mi kûdi sûri turtu-ã êre kor Ňĝo tani hananirĩ koo, orro hunã yidanú ; nura ôwonni nûre njûkã » či.



Gorsua tedoo nohi čunun ?



Ůu, « Nohi » či.



Taa, durdo numi-ĩ du čĩĩ hi ndû čunu ?



Durdo taa numi-ĩ du čĩĩ hi kowula du čubu.



Kawula čubã ndê ?



Kawula annaa-ã hadîe zonu-ã
hananuŋ ?



Yunu gibi di togusã ndû ċide ?



« Nuro durdo gunú. Durdo ngaa njîde ?
Tani kiñari baranirîe Oozua yernuru ni,
Kurrudo agamuru ni, Bordo tigiri ni, Čigĩ
hi tigiri wuzuru ni, tiri lûdura-ã gunuru ni,
Zuarko wônno tûduusu ni, Tusura tirĩ nuro durdo koo,
mbozoo kiñari guniĩ. Nû kiñari baranurú » ċi.



Yunu dirii tammo yugó ċunun ?



« Yunu dirii tammo yugó. Nuro durdo
koo mbozoo nogoũ dûe nurã zabtindîe
naĩ » ċi.

TIDEI MANAMANA MI



TIDEI MANAMANA mi ndo ?



TIDEI MANAMANA mi aũ Gûro du de aũ aŋgala wudu ni, môddo ni, aũ šieša dunodo ni, muro koo yugó.



Ŋga koo di anna čabči diri buri čunu ?



Gûro du anna čûkã Êhide yê Maaduna yê Huktia yê Arina yê. Tuda Gûroa mundu kiša-ã du haduda. Yum turo čabčunu : « Diri Tumagura-ã čubudã koo di tunda mannu budar ! » činã, anna-ã : « Yoo » čuo. Ômure gala ôguzuu yihido : « Ada du tunda diri-ĩ yendurã yendurdo, čuo. Ôsiri lukuri nuba kôi gudi a sobusu ! » čuo. Odo dġiři hunu turo ho galayunu ni « Diri-ĩ tani hi tiyendoo ni nuŋũú, tani hi tiyendunnoó ni dahu numa ha kubo yinak ! » či.

Anna ôsuri tûrrã, turo : « **TIDEI** hi diri-ĩ yendar ! » činã, guda-ã : « **TIDEI** tiyubudi aũ korou, aŋgala

wudi ni diri yenduroo, sũgoi tiyendu numo a di handurú. Ôreze ndurã gunna čubi. Aũ gudi turo ho yendar ! » čuo. Anna-ã : « Yoo » čuo.

Aũ gudi hi diri čendĩe su bozo. Lôko yerčundã, odi-ĩ dahu hunã kubo činak. Taa, anna-ã nerkadugundã, a di du niridenú Êhidi diri barayinĩe ni Wûri ted. Arini diri barayinĩe Yibi ted. Bũnno yihidu ni, anna ha bokunu ni, tar yihid.



A aũ dunodo.

ŠAHAĬ BUGAR MI



Ŋgo durdo ŠAHAĬ Tû yusobã, nûgoi ?



ŠAHAĬ BUGAR mi

« A Bardai le Derde
Chai tient une cour de
justice. »

(Photographie tirée
de planche XXVIII de
*Dictionnaire
ethnographique Têda*
par Charles Le Cœur
1950.)



Durdi-ĩ zaga yusobã, nahar
Hurasã-ã Tû ligĩ du, gubudi Tĩge čoŋ.
Tĩge čoŋã, bĩ ladia Tû li. Taa, anna-ã
gunna durdi-ĩ četu čaro. Durdi-ĩ Tezer

ted. Tezer ga čĩidi, adibi ba hunu turo Tugahun
ga aũ turo Tezer tedĩ čĩ čudurã, adimmi durdo
ŠAHAĬ hi ka keyi « Yuha li » čĩ. Mědi to bazuã,
durdo ŠAHAĬ zabtu li.

Lĩ dĩ adimmi kôĩ čĩĩ tigiri. « Li numa tiri » čĩ. Adimmi yuhadiadu : « Nirĩ, gali. Dgo durda yê giraša yê ta mada čindĩ durdo ôunne nuã četu yaamma mbo yaammoó gali. Čĩidi, nũ nogoũ yinak ! » čĩ.

Durdi-ĩ kôĩ taa yerčinã, Tĩge tigiri nahar Hurasa četu nogoũ činaũwo.

Aũ Tudo čĩĩ gunna, nogoũ yum to durdo **ŠAHAĩ** Tĩge tigiri činaũwã du čĩ. Adaga šera Tudaa-ã mannu to di bu yibeyuo.

Durdo **ŠAHAĩ** ma Tezer tedã ni nahara-ã ha anna-ã četu abusčundu tũri. Sũgoi zabtu ľĩ ni Tĩge tedu nogoũ činak.



Budi gali yogus. Sũgoi aũ gunna čabčunu ni adaga šera-ã činak.



Ůu, sũgoi aũ gunna čabčunu ni adaga šera-ã činak.



Nũ mannu anna-ã yunu su tũrri čũkã gunna to hi.



To muro.



Aũ muro koo, sũgoi yugurdo yugonnó
gunnũú ?



Yugurdo yugó.



Yunu durdo **ŠAHAĪ** yogusã koo aũ Tudo
gudi yogusudo yugó.



Yugó. Nũ ôwonni yunu anna Tuda-ã
čonĝu su turrĭ čũkã mannu, durdo
ŠAHAĪ yibeyinã ha. Nũ durdo bozuã
naani, yunu durdo **ŠAHAĪ** yibeyinã ha
čonĝu tedi.

ANNA BURBADA-Ã



Gali. Anna guru ŋgo dîne gibii-ĩ yoburčindi. Yoburu-ã de nũ zonu čĩidi, yunu zonu duo mannu, yunu nũ zonu-ã hananuũ njĩ. Tũrru ada annaa ni čoopi ; yoo, ôreze annaa ni čoopi. Yunu-ã zonu čĩidi, yunu nũ zonu-ã hananuũ ni su gali baraniĩ. Anna ada ŋgo yoburčindia burbada. Anna-ã gunna ada gunú čĩidi, guru čera hundã ada :

- **KALLIGO KOROMEĨ,**
- **MAHUMA NOKEDODA**
- **ŠÊNIME SÛLOLI** mi
- **YÛSUB DAZI** mi
- **ALIHA GETĨ** mi
- **KÔINA DURDI-Ĩ** mi
- **ŠELEMAĨ AZA** mi
- **HÊBIB ABAMOLĨ** mi
- **ADUM BÔLU DURDI-Ĩ** mi
- **WORDUGU EBEGEĨ.**

Ada anna burbada ni, anna čabčundu tũrru ni, ôreze annaa-ã ni čubudi, numa annaa-ã ni čubapi. Loko to yunu čĩĩ, to muro. Yunu to yogusudi. Ômure dunoda yunu zonu yoguso. Balak, gala hunda mannu čũo. Čĩidi, anna ada burbada.



ADUM BÔLI DURDI-Ĩ mi yê **WORDUGU EBEGEĨ** yê nga koo yogusudu ?



Gali, **ADUM BÔLI DURDI-Ĩ** mi Ôzungur tigiri dũe Midimidaa guyi. Dũe-ã guyunu zabtunã, Zala Kaziraa tigiri. **WORDUGU EBEGEĨ** arbi di Gunno. « Nogoũ loduri » čunu ni dũe-ã huzayi tigiri. Kôĩ to di goku ni anna ôguzuu ôguzuu čatu ni dũe-ã bereyuo.

YUSUB DAZI MI



Aũ Tũ tedã wuna ? Dga koo ni yogusu ?



YŪSUB DAZI mi anna guru četu Tũ ted. Tũrri Dumozo tigirdã, anna četã turo ho čubabu čĩd. Čĩduã yuhadiadu : « Aũ Tũ tigirdoo amma yĩdirã, aũ hu yuhadoo, muro hi mannu yĩdiri » či. Aũ to hi gibi duyundu ŋila ôguzuu bosuã, aũ turo « Guro wũni durru gibi dunurú » čunu ni yuhadu, čaa tũmudu numo yusob.



Ůu, tŷyidi čunu čaa ted.



Anna-ã gunna abusčindĩ aũ dunodon ?



Aũ dunodo numi-ĩ gunna kiliyi yida.
Anna tũdušu kora Zuar du čiddo čĩdi,
čaa.



A aũ yunu hanayinĩe yugonnó ni aũ
dunodo.

ANNA GUDA GABCUNDĀ



SÔNNĪ ŠELEMAĪ mi ndo ?



SÔNNĪ ŠELEMAĪ mi aũ dahu dûli ni aũ Tudo yili hunã hanayunnó ni yugó. Arbi hanayunnó ni yugó. Aũ dahu dûli aũ karayunnó čĩidi, karadudo koo.



ORDĪ ATMAN mi ndo ?



ORDĪ ATMAN mi mannu aũ karayunno yugonnó di karadudo koo. Dahu dûli yunu hiyindã naani hanayini.



WAŠA ndo ?



WAŠA mannu **ORDĪ ATMAN** mi koo.



MÛSA TOKOMO mi nga koo ?



MÛSA TOKOMO mi mannu yari. Ômuri yari ni ômuri dunodo ni mêdi čedoo, kôï muro čĩĩ kedugundu čîdi.



Gali, **DAZI ARAMAĨ** mi ndo ?



DAZI ARAMAĨ mi yari. Kiñari di borsu anna yiginnehi. Kiñari hunã dûli.



BOZO ÔIYAĨ mi ndû koo ?



BOZO ÔIYAĨ mi mannu yari. Aũ gali. Busau yala Oozuu-ã dahu hunã ha, ômuri muro di gali yugó.



TOLLĨ ÔBU KÔZI mi nga koo ?



Gabon dahu hunã ômuri muro koo yugó. Budi gali yari ni yari.



SALA WERKEDI mi ndo ?



SALA WERKEDI mi Muduruã dahu
hunã ha aũ muro koo kalli de yugó.



SUGUĩ TAŃGIŠI mi yê **HAĩ TAŃGIŠI** mi yê
ndo ?



Dubohur du mura koa ômure de kalla
yugondú.



Gali, **ALIHA GETĩ** mi ndo ?



ALIHA GETĩ mi tani mannu hananurú
čĩidi, ŋgo durdo **WÊDEI** labara hunã
tiyeni : « Ômure burbada šiša murdom
yê sã čû yê četu yobur mohurã muro di
ômuri kalli yugó », či.



Durdo **WÊDEI** mannu ngo yoburdon ?



Ůu, durdo **WÊDEI** yoburdo, **ALIHA** na četu čumohi. **ALIHA GETĪ** ômuri kalli. Durdo **WÊDEI** yuhadiadu : « Tû du ômuri dêbi keleyinîe Tumagur yê gudi yê gunna du ômuri **ALIHA GETĪ** mi du kalli, didi tani durrudo yugó » či. Tani mannu labara hunã tubazĭ gunnoó, **ALIHA** ha tani durrudo ni yugó, hananirĭe ni gunnú. Čĭidi, durdo **WÊDEI** budi gagačĭni.



Numi-ĩ du nahara-ã ha su čĭnaku yodurkun ?



Nahara-ã ha su čĭnaku yoduro.



AZAĪ TUDO mi aũ ndũ koo ?



AZAĪ TUDO mi Yibi dahu hu ômuri muro koo de yugó. Budi kalli.



HILER DAZI mi ndo ?



HILER DAZI mi **AZAĨ** muro koo. Aũ yobu čĩidi, ôskoro ni yida, ôsurda ni yida, yunu to ômurii hi baranumo yidannó yugó. Kalli.



ORJO MALUMA mi nga koo ?



ORJO budi kalli. Yibi dahu yê Mĩski yê du ômuri kalli **ORJO MALUMA** mi koo, toguŝe yugó.



SURDĨ ŠĪDI mi ndo ?



SURDĨ ŠĪDI mi kalli, budi kalli. Busau a Ômu hu guyunu ni Oozu hu guyunu ni kũruyunã, ômuri muro di kalli yugó.

NOGOŮ



Ňgo Yorogoidã yê Abiã yê ndû yogusudu ?



Ňgo Abiã Yorogoi yobur čumohudi. To koo di čûkoo, Yorogoidã Abiã lau nogoŮ baradia, anna yihitu ni keduguo.

Tigirndã, yuhatiadu : « Tunda yê nura yê kôî di nogoŮ nakaar ! » čuo.

Abiã yuhatiadu : « **GALMA MAHUMA** mi du čîn ? » čuo.

Yorogoidã : « Yugó » čuo.

Abiã : « **DADI SALAMA** mi du čîn ? » čuo.

Yorogoidã : « Yugó » čuo.

Abiã : « **MAHUMA YOROGOIDO** du čîn ? » čuo.

Yorogoidã : « Yugó » čuo.

Abiã : « Tundu ! Hurgĩã ada ha » čuo.



Tuyundun ?



Ůu, tuyuo.



Sûgoi nga koo yogusudu ?



Sûgoi anna tada tuyundã ha yûhudo.



Nogoũ činakun ?




Nogoũ činaũwo.



Sûgoi yoburčundudo yugonnũú ?



Ůu, sûgoi yoburčundudo yugó. Anna
tada barayindã, tigirdu ni nogoũ
činaũwo.



GORSU-Ã



Dgo Yogodi-ĩ Oozu čilau tigiri ni zaga kinečundu ni Yogodi-ĩ hi čĩtu bokundã yunu to baraniri.



Gali, Yogodi-ĩ ômure dûbu yida, Tû dahu hunã sagahunu yobur čumohã, tedĩ Ôruda tigiri wusči.

Hušunu hu guyinu ni, dĩ Maru hu guyunu ni, Abu hu guyunu ni, Duor su guyunu ni, Wûri hi guyunu ni, dûe čukã gunna guyi. Guyunã, Oozu Ôruda ha tigiri bozuã, wêtige yibeyunu ni « Anna Oozuu-ã yê tani nogoũ nakuru naani, nogoũ hu tobuzo. Tunda anna dômure » či.

To koo čunu ni, wêtige kedugu. Aũ turo malumma **MAHUMA** čindi, muro aũ Kũgu numi-ĩ di čĩ. **ÊYIME ARTASA-Ã** čindi, bũgudi Oozuu muro Têdemii. Yogodi-ĩ aũ kedugunã, wêtiga-ã tũku **ÊYIME ARTASA-Ã** ha če. **ÊYIME ARTASA-Ã** tũgohu anna numi-ĩ du čũkã ha mōyunu ni čabčunu ni wêtiga-ã maluma-ã ha čenu anna-ã gubia karayi. Karayinã, ndũ nunwo : « Nũ Yogodi-ĩ : ‘Anna Oozuu-ã yê tani yê dômure ni tani yê mura yê hoktudundu ni nogoũ nakaar !’ čĩ. » **MAHŪHUT LAĪLAĪDE** mi Têdemii bu tuzu čĩ. « Wêtiga-ã tendu laniri » čĩ. Wêtiga-ã čendã harči. Harčinã, « Yuson yuson mi hi čĩduã Yogodi-ĩ, yuson yuson mi hi čĩduã Yogodi-ĩ, yuson yuson mi hi čĩduã Yogodi-ĩ » činĩ ômure murta ôguzuu kora čida lûyunã, anna guru tigirtu « Huyo ! Huyo ! Huyo ! » čindã, ômure murdom soũ turo **MAHŪHUT LAĪLAĪDE** mi lau tigiro. **LAĪLAĪDE** mi lau tugurkuã, čoobu čuruk.

Ômure hunã tada ha aũ naani hi tĩnne kora tuzoo, tuzoo če. Čoobu anna tada ha togo tũgohu togusã, Yogodi-ĩ hi huzayunno. Tiga guru Ôruda yê Oozu yê kõi di čũkã kulo, bũgudi turo, **KÔRU** čindi, hayi čĩ. Dũe hunã murta ôguzuu Duon du Yogodi-ĩ guyunno turonnu yida ; doba hunã mali bũroyundu čendi. **MAHŪHUT LAĪLAĪDE** mi yê anna hunã yê kõi to dũnogu kôsurda tigiro. Bũgudi-ĩ lahayunã,

« Nogor ndeddo ? » či. « Tani yê Yogodi-ĩ yê doosko tadar » či. **KÔRU** « Dûi a hi yid ! » či. **MAHÛHUT** « Dûe nuã Yogodi-ĩ guyunu dûi sugu turonnu gabčinã yidirú » či. **KÔRU** « Dûe murta ôguzuu guyunoo dûi turonnu-ã ndû kohuri, dûi-ĩ daarú » či. « Yîd ! » či.

Taa, čîdo. Bûgudi-ĩ **KÔRU** čindĩ yuhadiadu : « Dûi a nduba anna gôni du kurukuã ni yîtũwo dahu hunã kazadu, diira yihitu ! Anna nuã sa môde koo, gorsu yidadú. Mbi surča hunã du čĩĩ yê kusar hunã du čĩĩ yê, gunna yongu ! Tani hi kišiga-ã gunnoó, yunu gudi tendũú ! » či.

Tûgutu ni yišu ni lôko zia hundã tokundã, togo tûgohu čoobu čuruk. Ôruda tigiri êmmi hi goki. Dûe kadura ču ômure dišee yidadu, yî čendu sôdorčundu ni môyogu-ã du dĩ čoopu tûrri čĩkiidi, **MAHÛHUT** tigiri kô di tûus. Odu allahar durusu togusudo. Aũ turo-ã sa mada du čaa ted. Anna guda-ã ha ña koo di gunna yîdisu gûe yugop.

Dûe kadura čû-ã guyinu ni, yogusã yogusî bî-ĩ ni bôliyi muro ni tûgohu Oozu dûe-ã yida tigiri. Bu Arkunu dahu čindĩ, Oozu du bu dûe-ã keyuo. Dûe ôguzuu kora ni čido. Odu, **MAHÛHUT** dûe-ã tigiidã, **ÊYIME ARTASA-Ã** čindĩ, obudo hunã mi aũ Têdemei, arbi di zumur hunu tûgohu naŋara di turonno duyí. « Dûe ada sa hundã ha ômure čûo, kuruku ! » či. Naŋara di turonno čubabi adiba

hundã ni wûwurčindi dî Êlou kayugi-ĩ hi tigiri bos.
Yogoda kadura čû gona turra yidadu kayugi-ĩ
tigirdã, adiba-ã ni wûwurčindi, ômure-ã ni naŋara di
turonno čubapi, Yogodo turo yuhadiadu :
« Zabtudo ! Tû hu ôwure murdom sã čû tobusã,
yunu a tûrtu toqusudo yugó. » Gudi turo
yuhadiadu : « To na. Wûrwur koo, ômure gûbule
kôij, tûduuso ! »

Bok! Ma kiši-ĩ tûusã gorsu kô to di yogusudã,
ÊYIMA ARTASA-Ã bugudi a Oozuu-ã ni yum to
morči. Anna guda hoo muro yê dîšee morčuo.
Yogoda ada anna kadura čû tigirdã gunna
tômuyuo. Anna tuzoo yee munurú gabčuo.
Gabčudã, turo tirmesu yugobo, turo sama yihitu ni,
ai turo čendu keyuo. Odu, anna yihitu ni Bordo ho
guyunu ni, Zûmuri hi guyunu ni, Abu hu guyunu ni,
Zuar su guyunu ni, aũ gunna čabtunã, Yogodi-ĩ
Ôruda ha čî tigirdu go čendoo ni, Yogodi-ĩ bui
arrakundú ; yî ni hakundú. Kô to di čuzuu Zala
gezeyi. Yogodo gunna werradunu ni tiri-ĩ hi anna-ã
gunna sohi čûo. Kô guru a ni ai čoŋgi, guru a ni
onjo čoŋgi.

Yogusidî Zala tigirdu ni Zala du yogusidî ma Bahar
anna dûbu čurukã du, anna koduro tigiŋo.

TUS.

Alphabets

Toubou	a	ã	b	č	d	e	ê
Français	<u>l</u> ac	s <u>a</u> ns v <u>e</u> nt	b	<u>T</u> chad	d	fête <u>l</u> ait	é <u>c</u> ole a <u>i</u> mer
Anglais	f <u>a</u> ther h <u>o</u> t	—	b	<u>C</u> had	d	f <u>e</u> d	<u>c</u> ake b <u>a</u> it
عربي	أ	—	ب	تش	د	—	—

Toubou	g	h	i	î	ĩ	k	l	m
Français	<u>g</u> are <u>g</u> uerre	—	—	<u>i</u> l l <u>y</u> cée	—	<u>k</u> ilo <u>q</u> uand <u>c</u> amp	l	m
Anglais	<u>g</u> et <u>g</u> uide	<u>h</u> at	s <u>i</u> t	s <u>e</u> at s <u>e</u> ed	—	<u>k</u> ing <u>q</u> ueen <u>c</u> ome	l	m
عربي	—	ح	—	إ	—	ك	ل	م

Toubou	n	nj	ñ	ŋ	o
Français	<u>n</u>	<u>N</u> djaména	<u>a</u> gneau	<u>p</u> arking	<u>f</u> ort
Anglais	<u>n</u>	<u>i</u> njury <u>e</u> ngine	<u>c</u> anyon	<u>p</u> arking	<u>b</u> ought <u>c</u> aught <u>l</u> aw
عربي	ن	نج	—	—	—

Toubou	ô	p	r	s (<u>s</u> ama du)	s (<u>s</u> ima du)
Français	<u>d</u> os	<u>p</u>	~r	<u>s</u> ale <u>t</u> asse <u>c</u> elui l <u>e</u> çon n <u>a</u> tion	<u>c</u> hat <u>s</u> chéma
Anglais	<u>b</u> oat <u>f</u> oe	<u>p</u>	~r	m <u>a</u> son l <u>e</u> sson <u>r</u> ice	<u>s</u> hip <u>s</u> ugar n <u>a</u> tion
عربي	أو	پ	ر	س	ش

Toubou	t	u	û	ũ	w	y	z
Français	<u>t</u>	—	<u>t</u> out	—	<u>o</u> ui	<u>y</u> eux	<u>z</u> éro ma <u>i</u> son
Anglais	<u>t</u>	<u>p</u> ut	<u>d</u> ue <u>d</u> ew <u>b</u> oot	—	<u>w</u> ater	<u>y</u> ard	<u>z</u> ero <u>e</u> asy <u>b</u> uzz <u>a</u> rd
عربي	ت	—	و، أ	—	و	ي	ز

Tudaga

a	A	ā	Ā	b	B	č	Č	d	D
									
aski		kayutā		barbi		čâhuri		dironu	

